

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 421112 23 St 2
Tuzla, 25.10.2024. godine

Općinski sud u Tuzli, stečajni sudija Vedran Milašinović, u stečajnom postupku nad stečajnim dužnikom „TOOL PRECISION“ d.o.o. Gradačac, ul. 25 novembra bb, nakon provedenog stečajnog postupka, donio je dana 25.10.2024. godine sljedeće:

R J E Š E N J E

OTVARA SE stečajni postupak nad imovinom dužnika „TOOL PRECISION“ d.o.o. Gradačac, ul. 25 novembra bb, matični broj subjekta 32-01-0001-12, JIB: 4210048040003, račun broj: 1321902011211349, otvoren kod NLB banka dd Sarajevo.

Za stečajnog upravnika imenuje se Almir Bajrić iz Tuzle, ul. Aleja Alije Izetbegovića 3B.

ZAKLJUČUJE SE stečajni postupak nad imovinom dužnika „TOOL PRECISION“ d.o.o. Gradačac, ul. 25 novembra bb, zbog nedostatka stečajne mase za pokriće troškova stečajnog postupka.

Rješenje će se objaviti na Oglasnoj tabli suda, WEB stranici suda, Službenim novinama F BiH, te dostaviti FIA.

Pravne posljedice zaključenja stečajnog postupka nastupit će po proteku osam dana od dana objavljivanja rješenja u „Službenim novinama F BiH“, a pravosnažno rješenje će se dostaviti Odjeljenju registra ovog suda, radi brisanja stečajnog dužnika iz sudskog registra.

O b r a z l o ž e n j e

Rješenjem Općinskog suda u Tuzli broj 32 0 St 421112 22 St od 18.04.2022. godine, pokrenut je prethodni postupak radi utvrđivanja uslova za otvaranje stečajnog postupka nad imovinom društva „TOOL PRECISION“ d.o.o. Gradačac, ul. 25 novembra bb, a za privremenog stečajnog upravnika imenovana je Almir Bajrić iz Tuzle, a sve temeljem člana 61. Zakona o stečaju (Sl. novine F BiH 53/21).

Nakon dostavljanja izvještaja privremenog stečajnog upravnika i održanog ročišta, sud je rješenjem od 12.07.2022. godine objavio javni oglas kojim je pozvao sva zainteresovana lica da u roku od 30 dana predjme troškove otvaranja i vođenja stečajnog postupka, a nakon što je rok protekao bez uplate predjma troškova, sud je rješenjem od 09.09.2022. godine otvorio i istovremeno zaključio stečajni postupak.

Odlučujući o izjavljenim žalbama povjerioca protiv rješenja od 09.09.2022. godine, Kantonalni sud u Tuzli je rješenjem broj: 32 0 St 421112 22 Pž od 15.02.2023. godine ukinuo rješenje od 09.09.2022. godine, te predmet vratio na ponovni postupak, sa uputom da je potrebno izvršiti procjenu zatečene imovine stečajnog dužnika (dvije mašine marke ChironFz i ostalih pokretnih stvari).

Postupajući u ponovnom postupku, u skladu sa uputama Kantonalnog suda, sud je angažovao vještaka procjenitelja koji je izvršio procjenu vrijednosti pomenutih pokretnih stvari o čemu je sačinio nalaz i mišljenje od 15.01.2024. godine.

Iz izvještaja privremenog stečajnog upravnika proizilazi da obaveze društva prema podacima iz posljednjeg finansijskog izvještaja predatog FIA iznose 1.036.481,00 KM (od čega je iznos dugoročnih obaveza 109.466 KM a odnosi se na dugoročne kredite društva, dok je udio kratkoročnih

obaveza u iznosu od 927.015 KM razvrstan na obaveze za kratkoročne kredite i ostale kratkoročne obaveze u iznosu od 127.472 KM, obaveze prema dobavljačima u zemlji u iznosu od 218.546 KM, dobavljačima u inostranstvu iznos od 497.547 KM, dobavljači povezana pravna lica u iznosu od 13.897 KM, obaveze po osnovu plaća i naknada plaća iznos od 20.579 KM, primljeni avansi u iznosu od 6.847 KM, obaveze za PDV u iznosu od 35.889 KM, te ostale obaveze u iznosu od 6.238 KM), s tim da bi definitivnu visinu stvarnih obaveza bilo moguće utvrditi samo ukoliko se otvori stečajni postupak a na osnovu prijavljenih potraživanja. Društvo u svom vlasništvu nema nepokretnosti niti novčanih sredstava, računi društva su blokirani konstantno od mjeseca novembra 2021. godine.

Društvo u vlasništvu ima pokretnu imovinu, čiju je vrijednost ovlašteni procjenitelj Nihad Jusufović iz Tuzle procjenio na ukupan iznos od 6.284,90 KM, i to vrijednost mašina Chiron FZ u iznosu od 6.143,00 KM (jedna mašina 4.212,00 KM, a druga 1.931,00 KM), oprema u iznosu od 91,00 KM, gotovi proizvodi 9,12 KM i materijal (šipkasti materijal) 41,78 KM. Po ocjeni suda ovlašteni procjenitelj je u svom nalazu i mišljenju naveo opis i stanje pokretnih stvari, obrazložio primjenjenu metodu procjene, te iskazao procjenjene vrijednosti stvari, pa kako na nalaz i mišljenje nije bilo prigovora niti primjedbi sud smatra da isti daje dovoljan osnov za procjenu vrijednosti pomenute imovine.

Nakon što je ovlašteni procjenitelj dostavio procjenu vrijednosti imovine stečajnog dužnika, privremeni stečajni upravnik je u spis suda dana 07.02.2024. godine dostavio projekciju predviđenih troškova stečajnog postupka sa specifikacijom istih, u kojoj je naveo da bi prema procjeni minimalni troškovi otvaranja i vođenja stečajnog postupka iznosili 14.932,00 KM (knjigovodstvene usluge 2.000,00 KM, takse FIA za predaju finansijskih izvještaja 180,00 KM, takse PDV registracija izmjena, deregistracija brisanje 60,00 KM, zakup za mašine, alate i gp. 2.000,00 KM, troškovi komisije za prodaju 400,00 KM, bankarske provizije 250,00 KM, izrada pečata, ptt troškovi, kanc. troškovi, ovjere 200,00 KM, nagrada za rad stečajnog upravnika (bruto) za 3 mjeseca 5.892,00 KM, naknada troškova stečajnog upravnika 300,00 KM, troškovi uređenja i smještaja arhivske građe shodno Zakonu o arhivskoj građi 3.000,00 KM), pa kako bi od uplaćenih troškova za prethodni postupak nakon isplate vještaku preostalo 1.500,00 KM, te pod pretpostavkom da se stvari uspiju prodati za procjenjeni iznos 6.284,90 KM, to bi bilo potrebno predujmiti preostali iznos od 7.147,10 KM (14.932,00- 1.500,00- 6.284,90=7.147,10) za otvaranje i vođenje stečajnog postupka.

Društvo HIGH-TECH Koncept d.o.o. Srebrenik je u žalbi izjavljenoj protiv rješenja od 09.09.2022. godine između ostalog navelo da je Općinski sud u Gradačcu na prijedlog navedenog društva kao tražioca izvršenja donio rješenje o izvršenju kojim je dozvolio izvršenje na pokretnim stvarima „TOOL PRECISION“ d.o.o. Gradačac, kao izvršenika, shodno čemu isti ostvaruje razlučno pravo na navedenim stvarima (mašinama Chiron FZ).

Odredbom člana 97 stav 2 Zakona o stečaju je propisano ko su različni povjerioci, te je alinejom b) propisano da su to povjerioci koji su zakonom, pljenidbom, sporazumom pred sudom ili pravnim poslom stekli neko založno pravo.

Iz rješenja o izvršenju Općinskog suda u Gradačcu broj: 28 0 Ip 077113 21 Ip od 27.10.2021. godine proizilazi da je određeno izvršenje na novčanim sredstvima na računu, a u slučaju da se ne bude mogla izvršiti pljenidba novčanih sredstava da se određuje izvršenje na pokretnim stvarima.

Odredbom člana 124 stav 1 Zakona o izvršnom postupku je propisano da tražilac izvršenja stiče pljenidbenim popisom založno pravo na popisanim pokretnim stvarima. Dakle, založno pravo na pokretnim stvarima se ne stiče samim donošenjem rješenja o izvršenju kojim se određuje izvršenje, već tek kada sudski izvršitelj izvrši popis i pljenidbu pokretnih stvari.

S obzirom da navedeni povjerilac nije dostavio dokaz da su u izvršnom postupku provedeni popis i pljenidba pokretnih stvari, stanje u spisu nije davalo osnov za zaključak da povjerilac ima razlučno pravo na istima.

Sud ukazuje da navedenu ocjenu daje isključivo radi daljeg postupanja u ovom postupku, a shodno uputama Kantonalnog suda Tuzla iz ukidnog rješenja od 15.02.2023. godine (posljednji pasus obrazloženja), a da bi definitivnu ocjenu postojanja razlučnog prava dao stečajni upravnik u slučaju da je stečajni postupak bio otvoren, te ukoliko bi bilo prijavljeno potraživanje sa zahtjevom za priznanje razlučnog prava od strane povjerioca.

Dakle, imajući u vidu sve navedeno, sud je utvrdio da je prijedlog za otvaranje stečajnog postupka dopušten jer je podnesen od strane zakonom ovlaštenog predlagača i osnovan s obzirom da je stečajni dužnik platežno nesposoban.

Privremeni stečajni upravnik nalazi da podnosilac prijedloga za otvaranje stečajnog postupka nije podnio prijedlog u roku od 60 dana od dana nastupanja platežne nesposobnosti, da postoji stečajni razlog za otvaranje stečajni postupka predviđen članom 6. stav 2. i članom 102. Zakona o stečaju.

U smislu odredbe člana 103. stav 1., a u vezi sa odredbom člana 102. stav 7. Zakona o stečaju F BiH („Sl. novine F BiH“ broj 53/21), a budući da dužnik ne raspolaže sredstvima za vođenje stečajnog postupka iz kojih bi se mogli podmiriti troškovi stečajnog postupka, sud je rješenjem od 13.05.2024. godine pozvao predlagača, povjerioca i sva zainteresovana lica da u roku od 30 dana od dana objavljivanja poziva u službenim novinama uplate iznos od 7.147,10 KM na ime otvaranja stečajnog postupka, iz kojeg predujmljenog iznosa bi se pokrili troškovi stečajnog postupka.

Rješenje kojim se pozivaju predlagač, povjerioci i sva zainteresovana lica, objavljeno je u Službenim novinama F BiH broj 39/24 dana 29.05.2024. godine, oglasnoj tabli suda i na web stranici suda, kojim se objavama javni poziv smatra dostavljenim.

Obzirom da u ostavljenom roku koji je propisan zakonom predlagač, povjerioci ili neko od zainteresovanih lica nije izvršio uplatu predujma za finansiranje troškova stečajnog postupka, sud je u smislu odredbe člana 102. stav 8. Zakona o stečaju, donio odluku o otvaranju i zaključenju stečajnog postupka, na način određene u izreci rješenja.

Temeljem odredbe člana 102. stav 8. Zakona o stečaju, rješenje o zaključenju stečajnog postupka dostavlja se nadležnom tužilaštvu Tuzlanskog kantona, Poreskoj upravi FBIH i Upravi za indirektno oporezivanje BiH.

Nadalje, temeljem odredbe člana 204. stav 1. i 3., a u vezi sa odredbom člana 190. stav 10. Zakona o stečaju, rješenje se ima objaviti na oglasnoj tabli suda, WEB stranici suda, Službenim novinama F BiH te dostaviti za FIA, dok je odredbom člana 204. stav 2. istog Zakona propisano da pravne posljedice zaključenja stečajnog postupka proizvode pravno dejstvo u roku od 8 dana od dana objave ovog rješenja u Službenim novinama F BiH.

Odluka o brisanju pravnog lica iz javnih registara temelji se na odredbi člana 204. stav 5. Zakona o stečaju.

Na osnovu odredbe člana 206. stav 2 Zakona o stečaju, osnivač društva je dužan preuzeti arhivsku građu i istu predati nadležnom arhivu na čuvanje.

Temeljem odredbe člana 102. stav 8. Zakona o stečaju sud je postupio kao u izreci rješenja.

STEČAJNI SUDIJA
Vedran Milašinović

POUKA O PRAVNOM LIJEKU:

Protiv ovog rješenja stečajni povjerioci i stečajni dužnik mogu izjaviti žalbu Kantonalnom sudu Tuzla, putem ovog suda, u roku od 8 dana, od dana objavljivanja rješenja u Službenim novinama.